

Date – 21/02/2025

Time - 7:30 -7:40Hrs

REGIONAL NEWS BULLETIN

HEADLINES (MORNING)

- 1. Sawhthing lei tanni, nimin khan Mizoram puma SCC 40-ah Sawhthing buk tan a ni a, tlai dar 5 vel thlenga chhinchhiah tawh zat chu Qtls 7879 a ni.**
- 2. 'Ek Bharat Shreshtha Bharat' hmalakna hnuaiah Larsap Gen (Retd) Vijay Kumar Singh hovin nimin khan Mizoram leh Arunachal Pradesh-te State puitlinga hlankai an nihna 'Foundation Day' lawm a ni.**
- 3. Union Home Minister Amit Shah chuan North East state 8 te chu Delhi nen thlawhna leh rel hmangin kum 2027 hmaa thlunzawm vek a ni dawn a ti.**
- 4. Delhi Chief Minister thar Rekha Gupta chuan Delhi hmasawinna tur hmalakna Mission Viksit Delhi atan theihtawp a chhuah chhunzawm tur thu a sawi.**

<><><>

GINGER

Sorkarin ruahmanna a lo siam lawk tawh angin nimin atang khan Mizoram hmun hrang hrangah sawhthing lakkhawm, lei leh hralh tan a ni a, Nimina Mizoram pumah SCC 40-ah Sawhthing buk tan a ni a, tlai dar 5 vel thlenga chhinchhiah tawh zat chu Qtls 7879 a ni. SCC thenkhat nimina tan lo, wawiin lama tan turte leh karleh kar tir lama bultan turte an ni.

Sawhthing man hi SCC atanga phurh chhuah a nih atanga ni 7 chhunga tihfel hman tum a ni a. District Agricultural Marketing Committee (DAMC) atangin farmer tin hnenah Direct Beneficiary Transfer (DBT) hmanga pek chhuah an ni ang.

Sorkar dinglai intiam tawh angin nimin khan district tina District Agricultural Marketing Committee (DAMC)-te huaihawtin sawhthing hi buaipui tan a ni a. Chief Minister Pu Lalduhoma chuan kuthnathawktuten sawhthing an hralhna tur ruahmanna fel tak siam a nih tawh thu tun hnai a ZPM Legislature Party inkhawmah a tar lang a. Sawhthing chingtute'n an thar ang ang te a bo a bang awm lo a an hralh vek tur thu a sawi. Chief minister chuan sawhthing hi a ruala chawh vek a rem loh chang a awm a nih pawhin, mipuite'n ruahmantute thu lo ngaichang thiam tura a duh thu a sawi bawk.

Nimin khan Lunglei District Agricultural Marketing Committee (DAMC) huaihawtin Lunglei District chhunga secondary collection centre (SCC) parukah kalpui tan a ni a. Kut hna thawktute hnen atanga Bana Kaih hnuaia sawhthing lei khawl sa phurh chhuah tur chu Tawipui North-I SCC atangin Lunglei District Additional Deputy Commissioner Pi Rochuangkimi Khenglawt chuan a vai liam.

Addl DC chuan Lunglei District-a SCC hrang hrangah sawhthing lei dan turah ruahmanna fel tak kalpui a nih thu a sawi.

Lunglei District chhunga SCC pariat zinga paruk (6) - Haulawng, Hrangchalkawn, Tawipui North-I, Buarpui, Thenhlum leh Phairuankai atangin sawhthing hi hralh chhuah a ni a. Lunglei District-a khaw hrang hranga sawhthing chingtute chuan an sawhthing tharte SCC-ah hian chhek khawmin, society kal tlangin an hralh chhuak tan a. Hunbi ruahman sa angin sawhthing hi hralh chhoh zel tur niin, a thawh khatna atan March ni 10 thlengin Lunglei District-ah hian sawhthing quintal 4,500 vel hralh hman beisei a ni.

Champhai District-ah pawh sawrkar flagship policy 'Ban a Kaih' hnuai sawhthing lei leh hralh chhuah thawhkhatna bultan a ni a. Champhai District Agriculture Marketing Committee (DAMC) kaihruaiin District chhunga Secondary Collection Center 10 ah sawhthing lei thawhkhatna hi March ni 20 thleng kalpui a ni ang.

Nimin tlai dar 3 thleng khan Champhai District chhunga Secondary Collection Centre 6, heng - Farkawn SCC, Khuangleng SCC, Vaphai SCC, S. Khawbung SCC, Mualkawi SCC leh Ramhrangkawn Champhai SCC kaltlangin sawhthing Qtls. 1274.81 lak khawm a ni.

Serchhip DC Pu Paul L.Khuma, Serchhip District Agriculture Marketing Committee (DAMC) Chairman chuan nimin khan Chhiahtlanga Secondary Collection Centre (SCC) a tlawh a. Loneitute thar chhuah sawhthing quintal 100 truck in a phurh chhuahte a vailiam a, Sairang panpui nghal a ni.

Serchhip District ah hian Secondary Collection Centre pasarih (7) a awm a. Heng SCC zawng zawngah hian sawhthing lei tan nghal a ni a. Sawrkarin ruahmanna a siam angin Serchhip District ah hian thla khat chhungin sawhthing kg 5,25,000 lei a ni dawn a ni.

Khawzawl District-ah Secondary Collection Center (SCC) 6-ah sawhthing lei thawhkhatna hi March ni 20 thleng kalpui a ni dawn a. Nimin tlai dar 6 thleng khan Sialhawk SCC ah – kg 13609 Khawhai - 12776 kg, Vangtlang - 35720 kg, Lungtan - 28522 kg leh Chawngtlai - 22100 kg te lakkhawm a ni.

Saitual Bawrhsap Dr. Lalngura Tlau, District Agriculture Marketing Committee (DAMC) Chairman ni bawk chuan loneitute thar chhuah sawhthing quintal 400 truck-in a phurh chhuahte chu Saituala Secondary Collection Centre (SCC) atangin nimin khan a vai liam a, Sairang panpui nghal a ni.

Saitual District ah hian SCC 7 a awm a, heng SCC 7 atang hian, nimin bikah SCC 3 atangin sawhthing truck trip 8 hralh chhuah a ni. Saitual SCC atang Qtls 400, Keifang SCC atang Qtls 370 leh Phullen SCC atang Qtls 360 te hralh tura phurh chhuah a ni.

Nimin vek khan Hnahthial District chhung khaw hrang hrang atanga Sawhthing chhun khawmna hmunpui - Secondary Collection Centre atangin

buk a hralh chhuah tan niin March ni 20 thlengin thawh khatna (First Phase) hi kalpui tur a ni dawn a.

Hnahthial District chhungah hian Secondary Collection Centre panga (5) - Hnahthial SCC, Cherhlun SCC, Darzo SCC, Tarpoh SCC leh Chhipphir SCC te awmin heng SCC atang hian first phase chhung hian quintal 5250 vel hralh chhuah theih tura beisei a ni a. Nimin khan SCC pathum - Hnahthial, Tarpoh leh Darzo-ah te Society hruaitute leh officials te endikna hnuaiah Sawhthing hi buk niin Sairang lam pana phurh chhuah nghal an ni a. SCC dang pahnih - Cherhlun leh Chhipphir te chu naktukah buk a, hralh chhuah tan tura ruahmanna siam a ni.

Sawhthing hi kg khat Rs.50 in sawrkar chuan a thar chhuak tute a leisak dawn a. Sawhthing hmun danga hralh chhuak duhte tan SCC kaltlang khera hralh chhuah a ngai lo a ni.

<><><>

GOVERNOR- EK BHARAT SHRESTHA BHARAT

'Ek Bharat Shreshtha Bharat' hmalakna hnuaiah Larsap Gen (Retd) Vijay Kumar Singh hovin nimin khan Mizoram leh Arunachal Pradesh-te State puitlinga hlankai an nihna 'Foundation Day' lawmna Durbar Hall, Raj Bhavan-ah buatsaih a ni.

Larsap chuan kalkhawmte chu Mizoram leh Arunachal Pradesh State-te dinchampha 'foundation day' pual chibai bukin duhsakna a hlan a. State pahnihte chu State nuam leh mawi tak, tribal hnam hrang hrang leh tihdan phung hrang hrang neite inrem taka khawsakhona a nih thu sawiin, hnam bil sawi lova State anga hmasawn tlanna tur ngaihpawimawh a tul thu a sawi a. Hnam ziarang leh tihdan phungte chu min phuarkhawmtu, kaihruaitu leh nihna tichiangtu a nih tlat avangin kalkhawmte chu ngaihlua vawngchim zel turin a chah a ni.

Larsap chuan Ek Bharat Shreshtha Bharat programme chuan India rama hnam hrang hrang, tawng, ei leh bar, incheina leh nunphung thlenga danglamte inkara inpumkhatna siam a tum tih sawiin, "an danglamna hi min thendarhtu tur ni lovin min phuarkhawmtu tur zawk a ni a, hei hian inhriatthiamtawna min pek bakah ram anga hmasawna kawng kan zawhnaah pawh hmalam min panpui zawk a ni," a ti a. India chu khawvel ram dangte awhravn leh beiseina kawnga entawn berte zinga mi a nih thu sawiin, hei hi kan zavaia thawhona avang a ni a, India ram hmasawna hi kan kutah a inngat tlat a ni, a ti a. India ram chu kum 2047 ah ram changkang leh intodelh, 'Vikshit Bharat' a hlankai tum a nih thu pawh sawiin, kalkhawmte chu tum mumal tak neia hemi puitlin thei tura theitawp chhuah turin a chah a ni.

Mizoram University (MZU) te'n State pahnih chanchin tawi an sawi a. Regional Institute of Paramedical and Nursing Sciences (RIPANS) zirlaite'n Mizo leh Arunachal Pradesh hnam lam te an entir a. Hemi hnu hian Governor hian hemi puala kalkhawmte hi kawmin hun hlimawm tak an hmangho a ni.

Northeast Areas (Reorganisation) Act, 1971 hnuaiah kum 1972 khan Mizoram chu Union Territory (UT) a puan a ni a. India ram Danpui siamthat

vawi 53-na, 1986 hnuah India ram State 23-na ni tura hlankai a ni. Arunachal Pradesh hi North-East Frontier Agency (NEFA) tih niin, kum 1972 khan NEFA chu Union Territory (UT) ah hlankai a ni a. February ni 20, 1987 khan India ram danpui siamthat vawi 55-na, 1986 hnuah India ram State 24-na a ni ta a ni.

<><><>

ASSEMBLY

Nilaini atanga tan, Mizoram legislative assembly inkhawm hun chhunga ngaihtuah turin dan thar siam tur leh dan dinglai siamthat tura rawtna 7 thehluh a ni tawh.

Assembly secretariat atanga thudawn danin sorkar bill thehltut tawhtute hi LESDE, UD&PA, Finance, Higher & Technical Education, Information & Public Relations, Excise & narcotics department te an ni. Nimin kha state puitlinga Mizoram hlankai a nih champha a nih avangin pisa chawlh a ni a, assembly inkhawm pawh chawlh a ni. Vawiin hian Prime Minister hlui Dr. Manmohan Singh sunna hun bakah, zawhna leh chhanna hun hman a ni ang a, larsap thusawi chungaw lawmthu sawina motion sawiho a ni ang a, chumi hnuah hun awm dan a zirin private member resolution sawiho tura thum vawr hmanga thlan sawiho a ni ang.

Zawhna hi nimin tlai thleng khan House chhunga chhan chi (starred question) 863 leh ziaka chhan chi (unstarred question) 98 a lut tawh a. House dawhkana dah tur lehkhaw pawimawh 5 lut tawh baw. Private resolution hi 85 a lut tawh baw.

Puan tawh angin tun tum Mizoram assembly inkhawmah hian March ni 4 khian finance changtu chief minister Pu Lalduhoma'n tangka kum thar (2025-2026) atana Mizoram sum hman tur ruahman (annual budget) leh kumin tangka kum kal lai a sum indaih lohna phuhrukna tur (supplementary demands for grants for 2024-2025) chu a pharh ang a. Hei hi Pu Lalduhoma'n budget a vawi 2 pharhna tur a ni. Assembly inkhawm hi March ni 20 thleng thutkhawm tura ruahman a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar hi puan leh a ni ang.

<><><>

UNION HOME MINISTER

Union Home Minister Amit Shah chuan North East state 8 te chu Delhi nen thlawhna leh rel hmangin kum 2027 hmaa thlunzawm vek a ni dawn a ti. Nimina New Delhi-a Unity Utsav-One Voice, One Nation ah he thu hi sawiin Pu Shaha chuan sawrkar laipui chuan kawng hrang hrangah hmarchhak state te tan hmasawna kawng a hawsak a ti a. Tourism atangin technology leh infiamna atanga vansang zirna thlengin kawng siam sak an ni a ti a. NDA sawrkar hnuaiyah hmarchhakah tharum thawhna thleng zat zaa 70 laia a tlakhniam thu leh tharum thawhna avanga thi zaa 85 a a tlakhniam thu a sawi

bawk a. Remna leh muanna siam a nih mai bakah mipui hnam nunphung pawhin hma a sawn a ni a ti bawk.

Pu Shaha chuan Prime Minister Narendra Modi hnuaiiah hmarchhak state te chu nihna thar pek an ni a. Ashtalakshmi hnuaiiah he hmalakna hi tihhlawhtlin a ni a ti a. Hmarchhak state te hnam rohlu leh ziarang te chu ramin a chhuang tih sawiin hmarchhak telloin India chu a famkim thei lo a ti bawk.

<><><>

US PRESIDENT

US President Donald Trump-a chuan Ukraine President Volodymyr Zelensky vauin a tel lo pawhin Russia nena an indona chu titawpin remna siam theih anih thu a sawi. US leh Russia ram palaiten remna kawng zawnga Riyadh-a an inbiaknaah Ukraine aiawh an tel ve loh avanga a lungawiloh thu President Zelenskya'n a sawi chu social media lamah President Donald Trump chuan a rawn chhang a. Tunhnaiah hruaitu pahnihte hi an in bei nasa hle a. President Zelensky hian Kyiv-a chanchinbumite hmaah US President chu thu diklo tam tak dawngsawngah a puh a. Hetihlai hian President Trump-a chuan Zelensky hi thlan lal ni siloa mimal thuneihnaa ram thuhnuaitu niin a puh a. Hei bakah hian President Trump-a chuan Ukraine chu indona ti chhuaktuah alo puh tawh bawk a ni.

<><><>

DELHI

Delhi Chief Minister thar Rekha Gupta chuan Delhi hmasawna tur hmalakna Mission Viksit Delhi atan theihtawp a chhuah chhunzawm tur thu a sawi. Chief Minister atana lakluh anih hnuah chanchinbumite kawmin he thu hi a sawi a. Rekha Gupta hian nimin tlai vek khan Cabinet thutkhawm hmasa ber a nei nghal bawk a ni.

Puan tawh angina BJP MLA Rekha Gupta chu Delhi Chief Minister atan nimin khan lakluh a ni. MLA-a thlan tlin anih vawi khatna niin Ramlila Maidan-ah Delhi Lieutenant Governor VK Saxena chuan Chief Minister hi rinawmna thu tiamtirin a lalut a ni.

Chief Minister rual hian Cabinet Minister paruk lakluh an ni bawk. Rekha Gupta hi Delhi Assembly inthlan neih zawh takah khan Shalimar Bagh atangin thlan tlin a ni a. Politics zinkawng hi Delhi University hnuaiia Daulat Ram College atangin ABVP member niin kum 1992 ah bul a tan a. Delhi University Students' Union President a ni tawh a. Delhi BJP Mohila Morcha ah General Secretary a ni tawh bawk a ni.

Nimin lakluh inkhawmah hain Prime Minister Narendra Modi, Union Home Minister Amit Shah leh Defence Minister Rajnath Singh bakah Union Minister thahnem tak an tel a. State 20 vel atangin Chief Minister leh Deputy Chief Minister te an tel dawn bawk a ni.

<><><>